



山川典第六十三卷

箕山部彙考一

按許由巢父之事傳記所載不同或曰堯讓天下於許由許由不受隱居箕山之陽又召爲九州長由不欲聞之遂洗耳於潁水濱時巢父牽犢欲飲聞其故以爲汙犢口遂牽犢而飲於上流或曰堯讓天下於許由許由不願語其故於巢父巢父以爲汙耳遂洗於潁水時樊仲父又以爲汙犢口牽犢而飲於上流總之世遠年湮弗可深考但其隱居之箕山自漢以來凡註經釋史者不曰在嵩山之下則曰在潁水之陽今觀河南登封之箕山正與經史合且故蹟皆確有據故以此山爲正而凡他處箕山傳爲許由隱處者亦各分考附載於此山後之

登封縣之箕山

許由巢父之行雖云過高然亦千載不可泯滅者故其隱處之箕山在史氏旣未有定論而後之作志者亦遂樂攘之以爲郡邑光今博覽羣書得所謂箕山爲當日隱處者不一而似可信者有五一在河南之登封一在山西之平陸一在直隸之行唐一在山西之遼州一在山東之莒州其在河南登封者距縣城之東南三十里卽中嶽嵩山之一支也有潁水經流其北昔人曾於此置縣卽取名潁陽其山一名鄂嶺又名許由山山上有許由塚及許由廟又有巢父塚棄瓢巖山之下有牽牛墟有犢泉又有洗耳泉及洗耳池相傳皆兩人之遺蹟云

登封箕山圖





考

按孟子萬章篇益避禹之子於箕山之陰趙註箕山之陰嵩山下深谷之中可藏處也孫疏正義曰案史

記裴駟註云劉熙曰陽城是今之潁川也箕山嵩高之北是也

按史記夏本紀益讓帝禹之子啟而辟居箕山之陽注陽字一作陰劉熙曰嵩高之北

伯夷傳

注

正義曰皇甫謐高士傳云許由字武仲堯聞致天下而讓焉乃退而遁於中嶽潁水之陽

箕山之下隱堯又召爲九州長由不欲聞之洗耳於潁水濱時有巢父牽犢欲飲之見由洗耳問其故對曰堯欲召我爲九州長惡聞其聲是故洗耳巢父曰子若處高岸深谷人道不通誰能見子子故浮游欲聞求其名譽汙吾犢口牽犢上流飲之許由歿葬此山亦名許由山在洛州陽城縣南十三里

按後漢書郡國志潁川郡陽城有嵩高山

注

孟子曰益避禹之子於箕山之陰註云嵩高之北

按晉書地理志河南郡陽城

注

有鄂阪關此邑是爲地中夏至景尺五寸有陽城山箕山許由墓在

焉



按魏書地形志陽城郡康城

注

孝昌中分陽城置有陽城關箕山許由隱窟

按水經潁水出潁川陽城縣西北少室山又東南過其縣南

注

潁水逕其縣故城南昔舜禪禹避

商均伯益避啟並於此也亦周公以土圭測日景處漢成帝永始元年封趙臨爲侯國也縣南對箕

山山上有許由冢堯所封也故太史公曰余登箕山之上注有許由墓焉山下有牽牛墟側潁水有犢

泉是巢父

一作樊父

還牛處也石上犢跡存焉又有許由廟碑闕尙存是漢潁川太守朱寵所立

按金史地理志南京路河南府登封

注

有箕山陽城山舊有潁陽鎮後廢

按潛確類書區宇部箕山在登封一名鄂嶺昔許由隱此堯召之爲九州長由不欲聞滌耳於潁川

之濱巢父牽犢去上流而飲之故山上有牽牛墟及許由廟漢潁川太守朱寵立碑潁水側有犢泉

石上跡猶存昔潁陽縣以此名

按河南通志山川箕山在河南府登封縣東南三十里昔許由隱此又名許由山有墓在焉

按河南府志山川箕山在太室東南二十五里亦名許由山益避禹之子於箕山之陰卽此初學記

曰許由山高大四絕其北有潁水堯讓天下於許由由不受而逃耕於潁水之陽沒葬箕山堯封其

墓號曰箕山公山下有牽牛墟墟側有犢泉是巢父還牛處也石上犢跡存焉又漢潁川太守朱寵於其上立許由廟

按嵩高志形勝箕山在太室東南高大四絕其形如箕太史公曰余登箕山其上蓋有許由塚云又名許由山 棄瓢巖初許由隱箕潁間以手掬飲人遺一瓢飲訖掛木上風吹漉漉有聲由以爲

煩棄之巖下

洗耳泉源出箕山或曰入潁或曰經汝州城西入汝

古蹟許由墓在箕山之巔太史公曰予登箕山其上蓋有許由塚云

巢父墓與箕山相近元人

楊奐有詩

洗耳池巢父洗耳處曹子建贊曰池主是讓以水爲濁

許由廟在箕山上

平陸縣之箕山

箕山一在今山西平陽府平陸縣東北九十里其形如箕相傳許由巢父隱此山上有許由巢父墓山下有清澗傳爲洗耳處



平陸縣箕山圖



方輿彙編山川典第六十三卷箕山部彙考二之一



考

按山西通志山川箕山在平陽府平陸縣東北九十里其狀類箕相傳堯時許由隱此有墓在焉太史公曰余登箕山其上蓋有許由塚云下有清澗卽由洗耳處東有白玉竅號曰錫窟按一統志北直隸行唐縣河南登封縣俱有箕山並稱許由隱處

按平陽府志山川箕山在平陸縣東北九十里盤旋危聳形勢如箕故名許由巢父隱居處 清澗在平陸縣東六十里箕山之西卽巢由洗耳處

按平陸縣志山川箕山在縣東九十里語同府志 清澗語同府志

墓塚許由墓在縣東箕山之西清澗之上去箕山二十餘里崇九尺周八十一步二塚南北並列其一或卽巢父塚也古柏參天雅稱勝地舊於五月有祭今廢按鄢陵亦有其墓豈以潁川有巢許之祠故訛傳與若此則真無疑也

箕山部彙考三

行唐縣之箕山

箕山一在今直隸真定府行唐縣西北五十里相傳許由隱此





眞定箕山圖



考

按畿輔通志山川攷箕山在行唐縣西北五十里峯若箕形故名相傳許由隱此上有許由墓窆瓢巖洗耳溪巢父問答碑

按真定府志輿地攷箕山在行唐縣城西北五十餘里 牛飲山在行唐縣卽巢父飲牛處

按行唐縣志地理攷箕山在縣治西北五十里峯若箕形相傳許由隱此有塚在其上 鄆河自

箕山西北發源流逕縣之東南入泝水 潁水在治西北三十里卽鄆水之上游也自兩嶺口山

谷流出南行三十里經箕山之東許由村之南傳云洗耳溪卽此也東流遂名爲鄆 許由壺窆

瓢巖洗耳溪巢父問答碑俱在箕山上 許由村在上房社 許由墓在箕山之上太史公曰

余登箕山其上蓋有許由塚云 許由祠在城西北隅卽舊學地也 許由橋在觀前

箕山部彙考四

遼州之箕山

箕山一在今山西遼州城東南七十里相傳爲許由隱處其上有許由洞其下有洗耳泉



許由洞